

四庫全書

史部

欽定四庫全書

欽定蘭州紀畧卷十一

甲申

上命軍機大臣傳諭阿桂李侍堯曰昨據阿桂等奏到
圖內賊匪所佔之華林山並龍尾山緊接蘭州西南
一帶關廂該處商賈湊集最為殷富而蘭州省城本
小轉在山下殊於形勢未協朕意欲將西面城垣展
寬至此山梁俾西關一帶民居及現在賊營佔據之

處一半包入城內如此跨山臨水既足以壯觀瞻並
可以資控制至河北金城關逼近黃河渡橋形勢亦
關緊要將來添設兵丁時亦應於該處多添兵丁令
將領大員駐扎似更足資彈壓且大河南北聲勢聯
絡於巡緝防守等事尤為有益著傳諭阿桂李侍堯
將此二事入於善後事宜案內一并妥議具奏

同日閩浙總督署浙江巡撫陳輝祖奏言

臣奉

旨查訊王亶望在甘肅藩司任內折收監穀有無通同

舞弊情事正值王宣望自海塘工所進省料理應
繳銀欸臣隨傳至署敬宣

諭旨據供我自三十九年八月間到甘肅藩司任已在
督臣勒爾謹奏准捐監之後我詳議規條原係收
捐本色後來風聞有折收之事當經責成道府查
禁彼時甘肅情形倉貯頗少我私心忖度只要各
州縣收捐之後將監糧照數買足自然倉貯充裕
隨時奏

聞見得我辦公有寔濟處這是我要討好糊塗的心事
所以既聞有折收情弊不過責成道府查禁結報
並不曾徹底跟究此即與通同作弊無異已屬罪
無可辭臣復詰訊其若非通同分肥豈肯明知屬
員違例折收不行嚴叅究辦王亶望總稱意在捐
多穀多以致一任通融辦理並無分肥人已等語查王
亶望借此分肥雖堅不承認但其縱屬私收折色
咎已難逭俟楊魁到浙臣再會同嚴切審問如有

舞弊分肥情事即一面奏

聞一面解部治罪奏入

上命軍機大臣傳諭阿桂李侍堯陳輝祖楊魁曰據陳輝祖奏查訊王亶望在甘肅藩司任內私收監糧折色一事既據王亶望供稱風聞有折色之事當經責成道府查禁結報且意在捐多穀多以致一任通融辦理等語彼時道府係屬何人如何假捏結報王亶望何以並不據寔供明著傳諭陳輝祖再行審訊王亶

望將彼時道府何人如何私收捏報各情弊令其逐一供明覆奏并傳諭阿桂李侍堯亦即將王亶望在甘肅時結報監糧各道府查案具奏至捐收監糧原為倉儲起見今既稱私收折色仍行買補穀石還倉且以捐多穀多為能事是該省之糧石充足可知何以每年又須賑卹即云各府豐歉不齊譬如河西各屬被災或致穀少則河東各屬豐收地方百姓自將糧石赴糶欲得貴價此亦流通便民之事百姓當亦

自知也何必輾轉經手官吏收買致令短價勒買官
得便宜而民仍受派累此事理之顯然者且即欲收
捐亦當聽本生自行交納本色或者捐監之人不致
抑勒百姓百姓仍得貴價也何須官為包攬以致弊
竇百出朕于監糧一事本為甘省地瘠民貧每歲不
惜百十萬賑濟以惠養窮黎若以惠民之事而轉為
累民之舉徒令不肖官員借端肥橐所關甚大況此
事不發則已今既經發覺自應跟求到底令其水落

石出此事積弊已久通省大小官員無不染指有罪
但亦斷不能因罰不及衆輒以人多不辦為詞即從
前之結報各道府此時已經陞調人員亦屬無幾無
難治罪况中外人材不乏斷無少此數人便不能辦
事之理此而不嚴行查辦將何事不可為也著傳諭
阿桂李侍堯務將此事如何舞弊分肥如何冒銷勒
買各情弊並向來朦混出結之道府嚴切跟究據實
指名叅奏倘阿桂等此次稍存瞻徇代為擔承將來

別經敗露伊二人其何以對朕耶

戊子阿桂李侍堯奏言查逆犯馬復才所供八蜡廟有樓房九間上下多是賊人糧草一節今八蜡廟已圍在官兵木柵之外該處並無樓房亦無賊人存貯糧草至賊營所踞周圍不過半里並無草束堆積其糧食俱口袋盛貯藏於地穴火彈既不能及而所支帳房半屬虛設賊人亦多不在內居住且被我兵每日鎗砲環擊俱經破毀是以前次

雖經製造火箭數十枝尚未施用至從前燒燬華林寺後樓房屋宇即係拋擲火彈俟將來逼近賊卡再行拋擲焚燒可使潰亂又奉

諭旨賊人所挖溝壕雖屬寬深或令官兵等填壕而進賊人必出而抗拒我兵即可用鎗箭剿殺仰見

聖明遠照於現在情形洞若觀火臣等寔深欽服查官兵自六月初一日夜於賊營南又架立木柵一層逐漸進逼並於木柵內接築砲台數座施砲放鎗

即欲為填壕而進之計數日以來賊匪乘夜又挖
深坑潛匿及於卡內藏身挖孔放鎗不敢探身出
望日間亦不敢于近處行走其為派出之好鳥鎗
手打倒者每日七八名至十餘名不等而挖溝挈
卡官兵亦間有受傷者臣阿桂與海蘭察明亮再
四籌酌現離賊溝尚有數丈計於第二層木柵外
接連刨挖人字形溝三處直逼賊壕相離不過數
尺復於溝上挈立木卡三座令官兵足以蔽身溝

內兩旁安門可以來往又於三木卡相間處通身
刨挖成溝並於柵內填築土臺用鎗砲在上擊打
來擾之賊然後令官兵於柵內及溝邊將枝捆土
袋拋入賊壕挑選奮勇官兵屯練在溝內預備俟
賊壕填滿即一擁而進自可期其得手惟初六日
大雨竟夜勢甚霧霈初七初八連綿不止直至初
九日始晴雖雨止即行刨挖而泥水甚大施力較
難伏思華林山上雖絕無水泉而經此數次大雨

賊匪承接藏貯可敷六七日飲用須再待五六日
方受渴困憊而此十餘日內又安知不雨是斷水
為最善最速之策而目今已覺其緩惟有遵照

諭旨指示俟數日內木卡拏成逼近賊溝填壕而進仰
仗

聖主威稜自應一舉集事奏入

上命軍機大臣傳諭阿桂李侍堯曰連日盼望捷音及
披閱奏函仍係籌辦情形且因連遇陰雨不能迅速

創挖而泥水甚大施力較難愈深憤懣想阿桂亦焦急愈甚至甘省近日雨水甚多致逆賊得以接濟固亦無可如何但糧食何以尚能久支况阿桂既稱賊營並無樓房貯糧而目下官兵四面環攻賊人已如釜底此時豈復尚有黨羽為之接濟何以尚能如此支持雖據阿桂稱斷不待其食盡坐斃但正恐不能不如此耳至甘省如此多雨而歷來俱謊稱被旱上下一氣冒賑舞弊若此安得不受天罰現命提訊勒

爾謹及王廷贊令其據寔供吐阿桂李侍堯務將此案徹底嚴查不可稍存瞻顧也

同日

上命軍機大臣傳諭留京辦事王大臣刑部堂官曰本日據阿桂等奏籌辦賊匪情形一摺內稱本月初六日大雨竟夜勢甚霪霪初七初八連綿不止等語甘省向年俱奏報雨少被旱歲需賑卹今阿桂屢奏稱雨勢連綿霪霪且至數日之久是從前所云常旱之

言全係謊捏該省地方官竟以折收監糧一事年年假報旱災冒賑作弊已屬顯然勒爾謹久任總督王廷贊亦久任道府藩司何以從前俱以雨少被旱為詞豈有今年甘省雨獨多之理著傳諭留京辦事王大臣前赴刑部會同該堂官提出勒爾謹當堂訊問並將王廷贊傳至刑部一併質訊令其據寔供吐錄詞具奏並著刑部堂官將王廷贊派員在衙門看守俟阿桂等覆奏到日再降諭

旨

己丑

上命軍機大臣傳諭留京辦事王大臣刑部堂官曰昨已降旨將甘省折收監糧冒賑作弊之事覆行提訊勒爾謹并傳王廷贊到部嚴訊此事折收既已屬寔又復冒銷災賑種種弊端難以枚舉現在阿桂等節次所奏雨水情形與甘省常年被旱之言迥不相符其為捏飾浮冒開銷監穀更屬無疑王廷贊在蘭州

守城時雖有辦理錯謬及獨自攘功之事然朕總念其保全省城功不可沒一槩恕而不究今伊若天良未泯能將甘省歷年如何通同舞弊之處逐款據實供明朕仍不忘其守城之功必加特恩寬宥即勒爾謹王亶望罪不可逭王廷贊尚可以功抵罪若伊竟執迷不悟始終不肯實說則是喪盡天良自取重罪不能復邀寬典矣況此事既已發覺斷無置而不辦之理即阿桂李侍堯亦斷不肯代為隱匿王廷贊若

不趁此時供明將來阿桂等查明奏到時又豈能再行狡展乎將此傳諭留京辦事王大臣及刑部堂官向王廷贊面傳諭旨令其同勒爾謹各自詳悉供吐即行據實具奏並傳諭王廷贊伊之生死總在此番定供與否令伊自定朕不食言

臣等謹案甘省折捐冒賑積弊經

聖明洞照斷不能稍為隱匿王廷贊久任道府藩司於

王亶望作奸翫法隨同附和迨傳

旨詢問又復含糊支飾其罪已無可寬我

皇上因念保守省城曾有微勞尚欲以功抵罪

命王大臣等諭以據實供吐必加寬宥並蒙

特示丹毫令其自定死生

大聖人解網深仁委曲周至實無以復加乃王廷贊天

奪其魄竟執迷弗悟不肯寔供則是喪良負

恩自罹於法無能再為解免者也

同日

上命軍機大臣傳諭陳輝祖楊魁曰前據陳輝祖奏審

訊王亶望私收監粮折色一事未將結報之道府何人逐一供明業經傳旨令其即行覆訊具奏此事私收折色于前勒買冒銷于後情節已屬顯然即王亶望亦不虞其始終狡展但楊魁陳輝祖等向其訊問並無証據未必肯據實供吐著傳諭陳輝祖即派妥員將王亶望挈交刑部嚴審並飭沿途小心防護毋致疎虞

同日

上諭內閣曰前以甘肅私收監糧折色一事明係捏災冒賑上下通同舞弊已屢經傳諭阿桂李侍堯徹底嚴查務令水落石出至監糧折收之銀大半歸於冒銷賑卹但賑卹一事甘省向來如此自應治冒銷者之罪不應因有此弊竟因噎廢食朕愛養黎元每遇各省水旱偏災不惜多費帑金優卹寧濫無遺以期不使一夫失所況甘省素稱邊隅饒瘠尤宜加意撫綏豈可以有冒賑之事遂致貧民或有拮据昔宋臣

曾有以薦人不當輒有悔意者時程子云願侍郎受
百人欺不可好賢之心稍替為大臣者尚應如此存
心況朕君臨天下保赤情殷亦寧可受萬人之欺不
肯使視民如傷之念因之稍懈也即以逆回一事而
論蘭州百姓並無從賊之人此實由朕平日子惠邊
氓有加無已是以閭閻激發天良不肯附從逆匪豈
非仁政之明效大驗耶總之甘省冒賑之弊斷不可
不辦而甘省賑卹之事仍不可不行著傳諭阿桂李

侍堯徧行出示甘省百姓使之家喻戶曉倍深愛戴
以仰副朕意

臣等謹案我

國家子惠黎元每遇各省水旱偏災不惜多發帑金
優加賑卹甘肅邊隅磽瘠尤蒙

聖心廑注蠲賑頻施至復准收捐監糧因慮採買病民
俾各糴糧輸納而閭閻餘粟亦藉流通本屬法
良意美無如地方大吏不能仰體

皇仁妥為經理甚且捏災冒賑奸蠹百出若不嚴行查辦何以剔弊懲貪我

皇上復慮及地方官因噎廢食不敢報災請賑以致貧民或有拮据

特頒訓諭愷切周詳寧受萬人之欺不肯使一夫失所大哉

王言不獨甘省士民均知感泣凡薄海內外無不益深淪浹矣

癸巳阿桂李侍堯奏言臣阿桂於十五日令海蘭
察明亮率同多爾濟色布坦那木扎彰霽泰斐英
阿福寧明山阿蘭保哈當阿阿彌都老格并侍衛
章京帶領奮勇官兵屯練降番及阿拉山兵先在
卡邊預備埋伏令海祿鄂輝旺親班巴爾烏爾圖
納遜帶兵策應舒亮仁和馬彪羅江鱗策卜坦三
德德寧武靈阿額爾亨額帶滿漢官兵各由本卡
相機進攻以牽賊勢伍彌泰莽古賚在龍尾山添

助聲勢臣阿桂臣李侍堯董率照料是日清晨轉
乘天氣濃陰出賊人不意方傳官兵將枝網土袋
拋入賊壕而我兵勇氣百倍哈當阿帶領降番屯
練首先跳入壕內與賊匪攪殺急令官兵用撓鉤
搭住溝沿賊卡鉤開土袋板片一面拋入火彈一
面踴身而上其卡內之賊惶遽奔竄我兵一擁而
進乘勢追殺殆盡隨將溝邊一帶賊卡十餘座及
第二層賊壕俱行佔得折毀賊卡填滿溝壕以便

兵丁往來行走賊匪見官兵已過溝卡知死在旦夕傾穴出迎抵死衝撲海蘭察明亮督率官兵奮勇勦殺賊匪潰敗竄回少頃又復前來衝突如是三次及被我兵剿殺無數始竄歸巢穴惟時各路帶兵將弁見正面官兵得手倍切奮勵三德德寧策卜坦帶領守卡漢兵及老教土兵由華林山西覓路攻進搶佔賊卡殺死賊人數十名仁和帶守卡官兵亦從華林山東直塹攀援而上殺散賊人

將塙土賊卡佔得海蘭察明亮令策應各兵即於賊卡前架立木柵一層未刻海蘭察明亮等帶兵撲入賊營痛加剿殺拋射火箭火彈燒燬帳房板屋其蘇四十三所住巢穴係板屋內挖地窟數層外用板片遮蔽所有賊營內衣服什物以及堆貯火藥糧食尚多因官兵拋入火彈時引起賊人火藥盡行燒燬奪獲賊人刀矛鳥鎗無算賊匪退回華林寺死守周圍預築土牆迤南有溝一道寺之西

旁尚餘零星帳房及賊人板棚土房一處敗殘衆
賊尚復拚死支持其時天已傍晚海蘭察明亮又
令官兵即逼近華林寺挈立木棚二層賊匪於木棚
將次挈成時奮力來撲日落後又衝突一次俱為
我兵鎗箭打回被殺亦多臣等飭令各官兵遇有
賊匪頭人俱須擒獻不可殺傷無如賊人狠戾性
成雖負傷甚重苟有殘喘俱儘力抗拒不肯束手
就縛有中箭五六枝尚持石奮擊者于官兵焚燬

賊營時猶復捨死前來搶奪糧食雨水寔屬獐狍
强悍是以官兵對敵時勢不得不即行殺死恐稍
遲即為賊人搶去本日殺死之賊除被賊搶去屍
身未經割獲首級外共割得賊首一百二十餘顆
陸續送至臣阿桂處呈驗因令前此被擒現尚監
禁候質之新教馬三十九及馬六十七等逐一詳
細辨認據認出蘇四十三韓一提把拉周阿渾張
懷德馬黑提卜首級五顆臣阿桂細驗蘇四十三

首級雖連鬚短鬚面白色與馬復才所供相符尚
恐難以憑信因派軍機司員會同按察使福寧陝
西鹽法道永慶攜帶蘇四十三等首級五顆飛馳
進城提出蘇四十三等家屬令其一併識認此內
蘇四十三首級不特蘇四十三妻妾認明哭泣即
其十餘歲幼女亦撫摩泣涕其為蘇四十三首級
確鑿無疑是晚又投出老教杜山別等四人_臣等
詳加訊問據供十五日官兵過溝攻卡韓一提巴

拉帶人守卡被官兵將韓一提巴拉殺死卡內有帶傷賊人逃回營盤告知蘇四十三見衆人害怕不敢上前親身拿帶刀矛同馬得明海朝宗張懷德張漢催衆迎敵向前攻撲彼時官兵鎗箭甚多蘇四十三等俱被打死賊營中被官兵殺死併帶傷的有三百多人現在退回華林寺居住者尚有韓黑提卜馬作南兩個頭人並能打仗者大小二百多人因韓黑提卜等二人不是大頭人衆人也

不甚聽他們的話但各人怕死不肯出來等語查此次過溝奪卡奮勇官兵屯練降番俱屬出力而降番尤為鼓舞先登陣亡三等侍衛吉爾坦保拜唐阿塔克達那受傷官六員

乾清門侍衛那木扎叅將阿什達祥保遊擊皂王保都司汪啟千總郭明宗兵丁內陣亡受傷者尚屬無多俟詳查明確另行造報現在賊人止有華林寺及寺旁板棚土屋帳房一處前挖溝濠一道死

守地更逼窄無難奮勇撲進但困獸猶聞而我兵
仰攻賊人於華林寺上放鎗抵禦恐不免損傷此
時首逆及緊要頭目俱已殺死所存不過敗殘賊
黨更不值傷我官兵現今官兵四面緊圍架砲轟
打華林寺俟賊人困殆即乘勢撲進將餘黨勦戮
淨盡

同日阿桂李侍堯又奏言此次官兵殺死賊匪阿
渾五人內周阿渾係河州新教回民該州于逆回

啟衅時即挈獲監禁後聞蘇四十三等往攻河州
因周阿渾係待訊人犯難以即行正法又恐被賊
人搶去隨將伊腿鏑斷嗣經賊匪攻破河州奪去
此次被官兵直入板棚內殺死馬得明亦係河州
新教在洪濟橋唐家川等處掌教蘇四十三過洪
濟橋時該犯帶同附逆回民從至蘭州至張阿渾
二人一名張懷德隴西回民係馬明心表姪一名
張漢安定回民係馬明心表侄婿從至蘭州為王

廷贊放出予賊者又海朝宗係蘭州城外海家灘
新教回民四月中旬伍弼泰仁和馬彪公同商酌
欲遣人至賊營明切曉諭解散黨羽擒獻首犯馬
彪隨令海朝宗前往被賊留住未回查周阿渾等
四犯甘心從逆罪不容誅律應緣坐至海朝宗雖
係馬彪遣往被留但聞該犯在賊營即稱阿渾與
蘇四十三等同坐議事且為賊人打仗受傷不法
已極其家屬應一併緣坐臣等現在將各該犯家

屬查拏到案照例治罪至蘇四十三韓一提巴拉
罪惡滔天神人共憤律應寸磔今於對敵時殺死
寔不足蔽辜所有該二犯家屬應即於省城盡行
正法以快人心至馬彪遣海朝宗前往賊營臣阿
桂等到蘭州數日後該提督即向臣告知臣思其
言是否確寔欲俟拏獲海朝宗訊問明白再行具
奏今海朝宗既被官兵殺死無可究問臣即詢之
伍彌泰仁和僉稱寔係公同商酌並非馬彪私自

遣去但馬彪既未專摺奏

聞伍彌泰彼時正在總辦亦未具奏均有不合謹據實
奏明再節次脫回老教雖查係三月二十九日護送
勒爾謹到蘭遇賊打仗被其裹去但伊等裹入賊
營已經數月不即脫回顯有從逆情節臣等以其
父兄弟現在隨同打仗未便即將伊等正法其
自上月十九以後脫回者明知賊勢窮迫始行投
出希圖寬免寔屬法無可赦臣等俟勦賊完竣後

再行辦理均奏八

上諭內閣曰此次圍勦賊巢馘斬首逆海蘭察明亮屢次率衆爭先攻奪賊卡殲戮甚多寔屬首先奮勇出力並哈當阿著交部從優議叙其餘在事出力之大小各員弁著阿桂等查明分別咨部議叙其陣亡之三等侍衛吉爾坦保著交部照例給與卹典拜唐阿塔克達那並著加恩照藍翎侍衛例議卹此外受傷各員弁及陣亡被傷之官兵等均著阿桂等查明照

例給與優卹至此次川省降番尤為鼓勇先登內受傷者著阿桂先加賞賚其餘一槩再行賞給一月錢糧以示獎勵其首逆蘇四十三首級並著傳示各省俾回民等共知儆戒再阿桂等奏此次官兵殺死逆黨阿渾五人內查出海朝宗一犯係四月中旬伍彌泰仁和馬彪遣赴賊營曉示被賊留住即稱阿渾與首逆同坐議事等語伍彌泰等身任將軍提督俱有奏事之責既經遣人赴賊營曉諭又復被留未回何

以並未陳奏直待阿桂等查出甚屬錯謬伍彌泰仁
和馬彪俱著交部嚴加議處

同日

上命軍機大臣傳諭阿桂李侍堯曰本日已刻遞到阿
桂等八百里奏報之摺知本月十五日官兵直撲賊
營痛殲賊衆所有首逆蘇四十三等俱經被殺割得
賊人首級一百二十餘顆等語已明降諭旨分別議
叙議卹矣此時餘黨無多且要犯首犯皆殲斃所


餘不過敗殘賊衆何以尚然如此死守寔不可解但此時自不值復煩我官兵用力攻勦祇須圍守嚴密或待其飢渴自斃便可乘機擒捕惟在掃除淨盡不致漏網為要至蘇四十三雖已不能生擒檻送盡法處治以快人心但其黨惡要犯中尚有韓黑提卜馬作南二犯均係頭人如能設法生擒解京審辦亦可跟訊賊人起事的確實情盡法處治至蘇四十三首級當照康熙年間辦理噶爾丹之例傳示各省回民

居住地方每處懸示數日使之共知儆戒再此時勦捕餘賊自屬易辦之事所有由京派往之海蘭察額森特及侍衛官員等著阿桂酌量如將來辦理餘黨尚需伊等帶兵則仍行暫留倘已無需多員或就其中酌令陸續先行回京並傳諭伊等到京後准其在家休息俟八月初再赴熱河以示優卹

同日

上又諭內閣曰此次勦滅撒拉爾賊匪海蘭察甚為奮

勉著加恩將伊子安祿授為三等侍衛以示鼓勵



欽定蘭州紀畧卷十一

欽定四庫全書

史部
欽定蘭州紀畧卷十二至
四

編修_臣李傳熊覆勘

總校官編修_臣程嘉謨

欽定四庫全書

欽定蘭州紀畧卷十二

己亥阿樞李侍堯奏言賊匪敗殘餘黨退入華林寺死守官兵拏去木柵四面緊圍架砲轟打至六月十六日亥刻賊二百餘人奮力來撲海蘭察明亮督率守士官兵奮勇剿殺鎗箭齊發賊人於鎗箭叢中拚死跳入溝內直至木柵邊希圖扳開木柵乘隙竄逸被我兵力砍矛戳殺死溝內餘賊

始倉遽竄回是夜殺死賊人數十名割取首級九顆賊始不敢於夜間復出衝撲又有連日投出老教三名經臣等詳加訊問據供頭人馬作南傷重身死至賊營所餘雨水業經臭敗衆人飲用二日至十八日俱已斷絕十七日晚賊黨有因爭水互相殘鬪殺死三人等語臣等伏思賊營首逆及緊要頭目俱已殺死此時雖止存餘黨三百多人如盡數生擒尚可審究謀逆情節擇其稍闕緊要者

解送

行在盡法處治若即督令官兵進撲賊人設或抗拒勢
不得不盡力剿殺又復殲戮無遺是以稍遲數日
俟賊人受渴困殆即進兵搜捕逐一擒拏一面令
官兵拏柵進逼施放鎗砲預備一擁撲入

同日阿桂李侍堯又奏言查甘肅收捐監糧原為
倉儲賑濟起見自應收本色糧石乃開例之始一
面奏立規條一面即公然折色收捐情弊顯然王

亶望僅以責成道府查禁結報希圖諉過又稱意在捐多穀多一任通融辦理更屬狡飾及王廷贊任內改歸首府提辦竟定以五十五兩一名收捐將銀兩發交各州縣買補如五十五兩之數足數採買則必甘省連歲豐收市糧充裕何以又需報灾賑恤若不敷採買而令各州縣經手又必有短價勒買及竟不買補虛開賑濟冒銷通同肥索種種情弊皆不出

聖明照察之中臣等現在公同熟商設法跟求一有間隙即嚴切究審務令水落石出

同日阿桂又奏言甘省收捐監糧惟開例之始為多近來報捐者已屬寥寥臣將歷年所捐數目比較惟乾隆四十一年王亶望任內收捐監生至六萬三千餘名為最多而是年賑恤案內所動糧數至一百七十餘萬石亦較歷年為甚其中情弊王亶望百喙難逃但在浙省訊問王亶望恃無質証

金史卷之八十二
仍恐轉輾狡飾似應將王亶望即行提解進京臣
陸續查有款蹟奏

聞時即可

勅交刑部堂官提集勒爾謹王亶望王廷贊三面質對
以成信讞均奏入

上命軍機大臣傳諭阿桂李侍堯曰據阿桂等奏賊匪
敗殘餘孽尚思乘夜衝撲希冀逃竄實為可惡然此
時我兵拏柵嚴密圍攻無虞竄逸自應待其困渴已

極即可一鼓成擒此事蘓四十三攻犯蘭州被官兵
擊敗後即死守華林山不復散往他處俾我兵得以
拏柵環攻盡數剿殺益信

上天嘉佑之恩再阿桂等覆奏查辦監糧折色一案此時
既已發覺斷不能置之不辦即結報之道府亦應查
明叅奏至王亶望任內捐收最多年分報災亦較重
其中情弊自屬百喙難逃阿桂等諒能徹底嚴查以
成信讞也

同日阿桂李侍堯又奏言臣等欽奉

諭旨蘭州河州民人為賊蹂躪應如何加恩優恤之處
查明具奏欽此臣等遵查該處民人至四月中旬後
陸續來歸臣阿桂抵蘭諭令地方官設廠施賑前
此流離顛沛之民今已漸次安集惟是兵燹之餘
十室九空兼之棲息無所墜埋乏費牛馬被掠則
無畜可耕地畝拋荒則收成無望自應仰體

聖恩從優撫卹臣等伏查被賊焚掠貧民應如何優卹

之處向無成例可循惟甘省乾隆三十年寧遠伏羌通渭等縣地震奉

旨優卹案內將壓斃人口每大口給埋葬銀二兩小口七錢五分倒塌房屋每間給銀二兩生存人口每口先給糧一倉斗初賑不論大小口賑給糧三倉斗再普行加賑一個月每大口日給京升糧八合三勺小口四合一勺五抄倘有禾苗被災者入於災傷案內分別辦理又賞給器具銀一兩壓斃牛

隻每隻借給牛價銀四兩分作四年徵還又奉

旨將寧遠羌通渭三縣該年應徵錢糧一體蠲免在
案此次蘭州河州被賊焚掠貧民困苦情狀實堪
憫惻蒙

皇上軫念灾黎

施恩優卹似應仿照地震灾民之例辦理凡有傷斃人
口每大口給埋塋銀二兩小口七錢五分燒燬房
屋每間給銀二兩生存人口每口先給糧一倉斗

初賑不論大小口賑給糧三倉斗被掠牲畜每牛馬騾一匹頭借給價銀四兩每驢一頭借給價銀二兩分作四年徵還務農民戶每戶賞給器具銀一兩其省城內外及河州附近一帶貧民業於閏五月初一日起先行開賑一箇月口糧至續歸之戶一體賑恤以廣

皇仁以甦民困臣等現在飭令司道督率地方官確實查明辦理務使窮民均沾實惠奏入

上諭內閣曰據阿桂等奏甘肅應行撫卹事宜請將於
蘭州河州地方照乾隆三十年寧遠伏羌通渭三縣
地震之例辦理等語此次甘肅蘭州河州等處猝被
逆回焚掠急宜加意撫綏以甦民困所有該處應徵
本年錢糧著加恩概行蠲免以示優恤該部即遵諭
速行其餘所奏卹賞各事宜並著行在戶部速議具
奏旋經戶部議覆應如所奏辦理得

旨如議行

臣等謹案自逆回肆擾佔據河州並侵犯省城
關廂居民不免失所

皇上僅念痼瘵於賊匪滋事之初卽屢降
諭旨令查明實在情形加

恩優卹臣阿桂等仰體

皇仁奏請撫卹各事宜卽蒙

勅部議覆迅速

允行我

皇上宵旰勤求俾蹂躪之餘得以早登衽席是以邊氓雖經兵燹而元氣不久旋復也

七月乙巳阿桂李侍堯奏言賊匪又於溝邊連夜收拾木卡三面共有十餘處因上次我兵用撓鉤鉤開木板土袋奪卡過溝更加填築堅實且將木植縱橫排立密布如鹿角以為賊卡外護二十一日有投出老教一名詢據供稱賊營尚有韓黑提卜韓六十個數頭人又有小木撒係蘓四十三徒

弟傳語衆賊以若即投出即違棄教門務須同死
方得好處係蘓四十三遺言各宜遵守至賊人斷
水業已三日等語臣等揣度賊人業已受渴困殆
擬即於二十三日進兵剿捕無如二十二日竟夜
大雨如注直至二十三日卯刻始止賊人又資接
濟勢不能待因即派兵乘賊人初得水飲精力未
復之時于巳刻撲進賊人雖不敢出卡迎拒尚於
卡內放鎗擲石抵死守禦而雨後潤濕官兵拋擲

火彈其板柵木卡不能延燒惟時我兵鎗箭齊發賊人雖多死傷不肯潰散臣等因官兵攻撲已久不免損傷至申刻傳令撤回二十六日寅刻海蘭察明亮率同彰靄泰斐英阿福寧明山阿蘭保海祿哈當阿鄂輝阿爾都并章京侍衛帶領奮勇官兵由正面進攻策卜坦三德德寧帶領守卡官兵及老教土兵由西邊攻撲舒亮仁和武靈阿帶領本卡官兵及屯練降番由東面攻撲我兵直至壕

邊賊人於溝內卡上奮力抗阻且賊人舊存板柵
土屋帳房連接緊密卡邊地勢狹窄又因躲避官
兵鎗砲刨挖溝壕縱橫數十道日間總於溝內行
走坑坎既多又有板片木植拉雜蓬蓋我兵至此
眼目既不能遠及手足更無從舒展久攻無益因
於辰刻暫行撤回令稍休息傳集將領弁兵飭整
鼓勵復於午刻乘賊人不備奮勇復進一面拋擲
火彈一面撲入賊卡痛加剿殺將溝卡盡佔得並

將溝內及守卡賊人殺死餘賊竄回華林寺我兵
三面鎗箭追擊殺死更多海蘭察等即督率官兵
將華林寺旁板棚土屋帳房盡行燒燬其內積存
糧食衣物亦多一併延燒奪獲賊人鳥鎗刀矛無
數並於賊人窟穴旁尋得窖水土坑二處即用土
填築此時賊人雖心胆已裂尚於華林寺土牆孔
隙及寺牆外溝內放鎗死守天已將晚因在所得
賊人溝卡邊逼拏木柵一層以防賊匪乘夜來撲

此次殺死賊人一百餘名割取首級五十三顆生擒一名馬格拉五訊據供稱此時華林寺內大小賊匪及受傷者約尚有四百餘人本日倉遽竄回糧食不能攜取所積雨水之處又被官兵佔得寺內存水無多不敷兩日飲用等語連日官兵奮勇攻撲損傷稍多陣亡官四員由烏什年滿進京告請存營効力之三等侍衛全海西安防禦羅密都司張進賢千總蔡珏受傷官三等侍衛阿禪保遜

濟奈藍翎侍衛瑪圖納叅領阿滿太佐領西爾們
八十七副將富舒叅將趙繼鼎遊擊程鵬翼都司
馬得高人傑守脩李基革職副將李天佑降番頭
等侍衛木塔爾三等侍衛丹把西拉布又前鋒鄂
木西奈護軍巴雅爾圖俱打仗受傷其餘滿漢屯
土兵丁陣亡受傷者俟詳查明確另行造報現在
賊人所佔不過一華林寺勢更淺窄幾無容身之
地且屢被剿殺窮蹙愈形自無難即日歲事奏入

上諭內閣曰據阿桂等奏攻剿逆回餘黨將華林寺旁板棚土屋帳房盡行燒燬殺賊一百餘名此次陣亡官員係三等侍衛全海西安防禦羅密都司張進賢千總蔡珏等語全海等奮勇剿賊臨陣捐軀殊為可憫著交該部照例優卹至革職副將李天佑打仗受傷著加恩賞還副將仍帶革職畱任俟四年無過方准開復又降番內頭等侍衛木塔爾屢經奮勇出力前已恩賞銀兩此次又復受傷著加恩賞給二品頂

帶其三等侍衛丹把西拉布著加恩賞給二等侍衛以示鼓勵其餘受傷各員及陣亡受傷之滿漢屯土兵丁俱著阿桂等查明一體照例卹賞

上命軍機大臣傳諭阿桂李侍堯曰賊黨垂斃之時尚敢抵死抗拒傷我官兵實堪痛恨但逆犯自知罪大惡極自不得不為苟延殘喘之計想官兵四面圍攻且又將華林寺旁棚土屋帳房盡皆攻得進拿木卡賊僅踞華林寺內為地無幾想不日亦即可殲滅淨

盡惟在防範嚴密不使一名乘間竄逸至現在尚有
逆匪頭目韓黑提卜韓六十個及蘓四十三徒弟小
木撒等在賊營率衆抗拒必得此三犯生擒解熱河
審辦盡法處治以彰國憲再阿桂等前奏撒拉爾回
衆共有十二工人数自必甚多此次作逆之蘓四十
三等不過其中之二三工將來事平之後須於善後
事宜案內將此數工歸地方官妥協經理使永遠敦
寧之處著傳諭阿桂等詳籌妥議

同日阿桂李侍堯又奏言查捐監首嚴折色以防
百弊叢生乃乾隆三十九年甘省開例之始即公
然折色收捐業經王亶望供認不諱而彼時各道
府並不盤查監糧有無亦即假捏結報共為欺罔
若非染指分肥通同舞弊何以一力擔承臣等伏
思此事所關甚大雖歷時已久人數衆多不可不
逐一嚴叅徹底跟究所有王亶望任內假捏結報
之厯任道府直隸州知州謹詳悉查明叅

奏請

旨將道員內陞任甘肅藩司王廷贊現任江西藩司秦
雄飛甘肅臬司福寧甘肅西寧道劉光昱四川
北道熊啟謨甘肅安肅道奎明浙江寧紹台道蔣
全迪河東鹽運使程國表山東糧道觀祿知府各
員內現任甘肅涼州府知府汪皋鶴廣東高州府
知府周人傑甘肅甘州府知府鍾賡起甘肅寧夏
府知府張金城

泰陵郎中觀亮署知府各員內現任江西廣信府知府康
基淵甘肅泰州直隸州知州侯作吳直隸州知州
各員內現任刑部員外郎覺羅彥方湖北安陸府
知府姜興周甘肅鞏昌府知府宗開煌署直隸州
知州各員現任甘肅靈州知州黎珠甘肅寧夏縣
知縣宋學淳等現任官二十一員革職除王廷贊
及覺羅彥方現在京中請

勅交刑部就近審訊外其在甘省各員臣等即一面究

訊至現任他省人員應令刑部行文各該省督撫
委員押解來甘質訊又丁憂事故潘時選德明奇
明黃元圮博赫郭昌泰陳之銓崧柱吳鼎新魏椿
年瑞泰楊士璣李承瑞等十三員應請

勅交吏部工部查明如已補官一併革職押解其已經
革職者亦行文原籍督撫派員解審即病故各員
亦查明知照以便定案時扣除至王亶望陞任以
後各道府雖係相沿結報罪亦難辭俟臣等審明

陸續叅奏再現任甘省道府缺出甚多除另摺奏
補外一時實無妥員委署應令被劾各員暫留頂
帶辦事俟新任到日再行交代臣等有應行訊問
事件即傳集究審亦無慮其彌縫掩覆

同日阿桂李侍堯又奏言臣等查辦監糧折色收
捐一事現向按察使福寧鞏昌府知府宗開煌嚴
切究訊據福寧供開捐之始即係折色並未交糧
上倉藩司原屬知情其實收王亶望摠交蘭州府

存貯給發各州縣或多或少俱係藩司主政各省
捐生俱赴蘭報捐而各州縣亦就近在省填捐至
各屬折色銀兩並未見買補歸倉多係放銀抵糧
盤查既屬具文按季出結亦係虛應故事等語宗
開煌亦有四十一年署西州任內敦煌玉門兩縣
冊結因未曾到任盤查詳請展限王亶望不准只
得在省城出結之供是王亶望明知各州縣係折
色收捐徒取道府一結為異日諉卸之地據福寧

供各屬報灾分數俱由藩司議定或於總督具

奏後藩司補取道結或取空白由藩司填定從未親

往勘驗即放賑時亦從未親身監視等語其中情

弊已屬顯然且臣等檢查王賈望任內各屬報捐

實收及開銷賑卹原案即如皋蘭一縣於乾隆四

十年捐實收四千八百張應收糧十九萬一千九

百餘石是年即開銷賑卹糧十五萬五百餘石銀

一萬七千二百餘兩四十一年共捐實收八千張

應收糧三十二萬石是年即開銷賑卹糧二十三萬四千八百餘石其餘各屬雖參差不齊大約多捐者賑卹必多其無災賑地方則報捐亦少是王亶望發給實收之多寡竟若預知各屬被災之輕重而定數者其為通同侵蝕任意開銷已無疑義至甘省上下如何舞弊分肥之處臣等查閱王廷贊致福寧原札內有前任陞司於額收公倉費銀外各屬請領實收每張議收銀一兩以給上下各

衙門吏役襍項之需等語查監生每名交公費銀四兩以二兩解部以二兩作各衙門書吏公費自五錢至二錢不等定數不為不多乃王亶望復於此外議收襍費銀一兩是明知捐監一事弊竇多端借此取悅衆人以塞其口且王廷贊到任後又於襍費銀一兩外每實收一張索銀一兩此衆所共知諒王廷贊亦無從隱諱若王亶望之舞弊分肥臣等詢問福寧據供王亶望在藩司任內各屬

給發實收多少由其專主報災輕重由其議定厚薄因人而施自有交通染指情事即伊陞任後無人不知其擁厚貲而去但當日如何婪索屬員如何餽送不能指出實在憑據等語臣等伏思此事總不過首府首縣數人經手聞王亶望到任後即稟知勒爾謹將蔣全迪

奏調蘭州府承辦捐監事務而王亶望即將實收交首府存貯轉發各州縣並於襍費一兩內議給首

府衙門三錢是即勾通舞弊之據且蔣全迪在蘭
州府任內捐陞道員人亦有言其得厚貲者該員
現任浙江寧紹台道已於假捏結報案內另摺叅
奏請

旨革職應一併提解至京與王亶望質訊再王亶望任
內初開捐時之皋蘭縣知縣程棟現已捐陞刑部
員外郎在京供職應請

勅交留京王大臣刑部堂官就近傳訊令將在任時如

何冒銷如何賄求各款逐一供明俟王亶望到時
質對無難水落石出臣等現亦提到王亶望在任
時接任皋蘭縣已陞狄道州知州鄭陳善嚴切究
訊據供王亶望聲名狼籍通省皆知有要捐的監
生將監生名姓開單交給州縣令其用印填捐並
不發給銀兩再四十年程棟辦理賑卹案內有運
送適中給散賑糧腳價銀二千四百餘兩係我例
應補領之項王亶望並未發銀等語臣等查王亶

望任內四十四十一兩年所有皋蘭縣開銷此項
腳價銀六千六百餘兩即以通省均未給發而論
亦不過三萬二千餘兩王亶望之貪婪當不止此
然此亦侵蝕之一端其通省如何冒賑開銷之處
現在設法研求俟訊得確情續即具

奏均奏入

上諭內閣曰前以甘省收捐監糧一案私收折色冒賑
浮銷上下通同舞弊既經發覺不可不徹底查辦因

屢傳諭阿桂嚴切詳查據實叅奏今據阿桂等將折收銀兩在省包辦冒銷賑糧種種弊端已全行查出此時即將甘省大小各員一併革職審究亦皆罪所應得但此事總在藩司為政其次則首道首府首縣勾通侵蝕為弊較多此外各道府州縣雖弊實亦皆不免而此時尚未查明無庸遽行辦理所有前任蘭州府知府蔣全迪前任皋蘭縣知縣程棟自當革職拿解蘭州嚴審此外各員著交吏部查明其曾任蘭

州本道首府及首縣者著即一體革職拿解蘭州審訊其餘各道府州縣並加恩免其提訊著該部查明再降諭旨至王廷贊前來行在時令軍機大臣傳旨訊以監糧一案伊堅稱並無情弊後遣令回京候旨又令留京王大臣會同刑部堂官覆訊並傳示硃筆諭旨以伊之生死在實供與否令其自定朕不食言乃伊仍祇供辦灾以少報多以輕報重難保必無而於一切情弊始終不肯供吐今阿桂等業已跟究明

確弊竇甚多是王廷贊之罪更不能復加寬貸王廷
贊著草職拿問解交行在俟王亶望解到時交軍機
大臣一併會同行在大學士九卿質訊

辛亥

上諭內閣曰本日據吏部查奏王亶望在甘肅藩司任
內通同折捐冒賑之首道府縣各員除蔣全迪程棟
已經革職拿問外所有曾任蘭州道之秦雄飛熊啟
謨俱著革職拿問交與阿桂等嚴審至三十九年甘

省開捐監糧以來即在王廷贊任內之道府州縣均屬通同舞弊自應一體嚴審所有已經查出之前任蘭州道陳庭學現任蘭州道圖薩布前任皋蘭縣知縣鄭陳善楊惠言亦著革職拿問交阿桂等併案嚴審

欽定蘭州紀畧卷十二

欽定四庫全書

欽定蘭州紀畧卷十三

壬子阿桂李侍堯奏言本月初五日海蘭察明亮
派奮勇官兵及屯練降番在木柵邊照常放砲打
石使賊人不備午刻海蘭察明亮率同侍衛提鎮
督率弁兵直至壞牆邊先將樹枝草捆隔牆擦入
填滿溝壕然後拋擲火彈施放火箭引火焚燒其
時賊人尚於牆邊抵死抗拒我兵站立壕邊向內

鎗箭齊發，斃殺甚多，火勢益熾，賊人不能存住，始紛紛退竄。華林寺殿屋雖已擊坍，尚存一角及圍牆。賊人在內藏匿，死守我兵一面施放鎗砲，一面運送樹枝、草捆及木植板片，將溝內之火用土填滅。直過溝壕，用樹枝等物撩積寺基，拋擲火彈，燒起賊人，抵死衝撲，數次俱被官兵鎗箭打回。酉刻寺內殘壞屋簷被燒坍倒，賊人打死燒斃者甚多。始遑遽竄回華林寺後牆邊，及兩廂房牆圈內藏。

匿放鎗擲石盡力抵禦官兵正欲乘勢將燒殘木
植拋入牆圈再用樹枝草捆一併填燒令賊人不
能存立其時已至亥刻黑夜難以用力因暫將官
兵撤回初六日黎明海蘭察明亮率同彰靄泰斐
英阿福寧明山阿蘭保多爾濟色布坦海祿哈當
阿三德德寧武靈阿鄂輝阿爾都並侍衛章京帶
領奮勇屯土官兵由華林寺前撲入並預行分飭
舒亮仁和馬彪羅江鱗策卜坦等各帶本卡官兵

預備賊人分竄即協力擒勦卽刻我兵拋擲火彈鎗箭齊發並短兵砍殺賊人竄入後牆壕內及燒燬房基潛匿官兵緣牆而上站立牆頭向下放鎗擲石打死壕內牆角賊匪甚多衆兵奮勇撲進擒拏勦殺其時有賊人百餘從西邊滾下直礮我兵隨後追殺至平坦處又有仁和馬彪等率領本卡官兵將賊人重重圍裹在內擒殺淨盡其華林寺後躲藏餘賊亦殲戮無遺共生擒賊人六十七名

割獲首級四百五十顆陣亡由京派來之司鞍果
倫察屯練土外委卽卡太受傷副護軍叅領達薩
鼐藍翎侍衛萬濟鼐親軍哲克屯練巴圖魯土把
總卽思甲軍機處行走戶部員外郎舒濂亦帶箭
傷其餘陣亡受傷兵丁俟查明造報查逆回於光
天化日之下輒敢肆擾不法實屬神人共憤蘇四
十三攻犯蘭州被官兵擊敗後卽同衆死守華林
山不復散往他處俾我兵得以桴柵環攻盡數勦

殺皆由

聖主洪福

上天眷佑而臣等奉

命督辦雖遲至三月餘將賊人殲擒淨盡不致一名漏

網實仰仗

皇上天威得以蕆事

同日阿桂李侍堯又奏言安定縣馬明心家屬及其心腹徒弟並伏羌縣為伊鍛銀之新教阿渾與

各逆黨家屬業經派按察使福寧前往督率地方
官按名查拏解省審辦如此間訊出各該處果有
從逆回民即行一併嚴辦至洪濟橋唐家川等處
從逆回民於四月初旬自蘭州竄回被土兵勦殺
及淹斃者二百餘名又陸續拏獲正法者百餘名
隨賊打仗傷死者三百餘名現在該數處所存新
教餘黨諒已無多此外不過查拏各該犯緣坐家
屬亦屬易辦臣等已提到該處烟戶冊挨查並檄

調河州知州謝桓至省面詢情形仍向現拏各逆
犯嚴切跟究實力妥辦總之搜捕逆黨務期淨盡
根株必不使復留餘孽

同日阿桂李侍堯又奏言賊匪肆逆以來所有從
賊各犯省城正法二十名河州西寧二處正法五
十七名業經具

奏在案嗣省城盤獲從賊各犯及由河州循化等處
提解至省審明應正法人犯二十六名又循化廳

文武員弁帶領老教土兵陸續搜獲新教逆犯及
婦女幼孩共三十四名口俱經分別核辦內韓阿
渾即馬六十七一名前據省城拏獲賊匪供稱該
犯與蘇四十三帶領賊人分路滋擾一至河州一
至循化蘇四十三因守華林山尚望其救援等語
嗣據舊教土司拏獲解省臣等嚴切研鞫據該犯
供三月間起事時蘇四十三令其糾約各莊未到
新教隨後接濟該犯糾約三百餘人尚未齊全即

被循化官兵帶同舊教土兵衝殺擒拏該犯藏匿
山中幾及三月始被搜拏等語是賊匪所供分路
滋擾事屬有因且聞該犯在撒拉爾地方為新教
衆回所信奉與蘇四十三相同其賊人未到河州
以前謀逆起釁各情節可以向其跟究應解送

行在辦理其餘各犯業已隨時正法至現在省城及各
處監禁之逆賊婦女幼孩三百十五名口除將蘇
四十三韓一的巴拉家屬十一名口業經正法外

餘俟遵

旨分別發遣均奏入

上諭內閣曰本日據阿桂等奏殲擒逆回餘黨淨盡一摺逆匪負隅固守官兵得以全數勦殺竟無一名漏網實堪稱快除海蘭察等已於阿桂等前次奏捷時交部從優議叙外所有此次打仗陣亡之司鞍果倫察著加恩照藍翎侍衛例給與卹典屯練土外委卹卹卡太並照土千總例議卹受傷之屯練巴圖魯土把

總郎思甲著加恩以上守備用此外受傷各員并及陣亡被傷官兵著阿桂等查明照例優卹至軍機處司員戶部員外郎舒濂亦帶有箭傷著加恩賞戴花翎其屢次打仗奮勇受傷之頭等侍衛木塔爾前已賞給二品頂帶著再加恩遇有四川管理降番之副將缺出交該督酌量題補

臣等謹案賊首蘇四十三及黨惡要犯已就誅戮且糧食燬盡存水無多賊匪已無可倚恃乃

狼戾性成於竄入華林寺後魚釜游魂尚敢死
力抗拒直至官兵樹柵火攻始將敗殘餘醜殄
滅無遺此實賊黨戾氣所鍾自致聚殲竟無一
人倖逃法網

天道之昭著與

王法之森嚴並足垂戒於萬世云

同日

上命軍機大臣傳諭阿桂李侍堯曰此次勦捕逆回雖

因其死守抗拒遲至三月有餘始行殲滅然使賊於
一月前衝突而逃勦捕正自費力今乃佔聚華林山
寺俾官兵得以全數殲擒竟無一名漏網仰賴

上天嘉祐朕愉快之餘惟益深虔畏耳至阿桂等所稱馬
明心家屬徒弟并伏羌縣斂銀之新教阿渾與各逆
黨家屬已委按察使福寧前往查辦等語所奏甚是
此等從逆回民露有形迹証據者必須全行搜查不
可稍存將就了事之見至省城及循化河州等處監

禁逆犯之婦女幼孩人數甚多著阿桂等查明將應發烟瘴者即行分別發遣毋令久稽監獄

同日阿桂李侍堯又奏言查首逆蘇四十三首級當官兵奮勇追勦其如何被殺及為何人所殺緣由無從查詢及至陸續呈驗令韓阿渾等及伊妻女認出時當即飭令官兵務將屍身尋獲而其時所有割獲首級衆賊屍身俱為官兵砍碎實無從辨認是以即將蘇四十三及各頭目首級懸掛蘭

州各門號令今奉

旨將蘇四十三首級傳示各省回民居住地方臣等伏

思馬明心雖未有助逆實跡然其叛教啟釁寔係

禍首罪魁現今刨出屍身剗骨揚灰其首級一併

同懸示衆所有蘇四十三首級現已裝盛木桶並

奉到告示頒發各省每處懸示數日俾回民共知

儆戒

同日阿桂又奏言查辦理賊匪餘黨一事其洪濟

橋唐家川等處從逆回民陸續搜捕勦殺已有五百餘名縱有餘孽已屬無多至安定伏羌等處亦無需帶兵搜捕毋庸海蘭察等在此幫辦臣即令明亮先行馳赴

行在海蘭察額森特舒亮隨後亦即帶領侍衛官員起程再土司楊宗業番兵一千二百名及保安土兵一百名俱於六月二十三等日飭令分起回伊審地訖又西安先撤回滿兵一千名寧夏先撤回滿

兵五百名亦於七月初一等日分起自蘭州起程
其西安副都統薩炳阿即令帶兵回陝均奏入報

聞

同日阿桂李侍堯奏言臣等遵旨傳集司道及在
省之府廳州縣各官反覆開導訊究冒賑舞弊實
據令其逐款開出茲據蘭州府知府陸瑋鞏昌府
知府宗開煌平涼府同知閔鵬元蘭州府同知善
達署肅州知州州同董熙狄道州知州鄭陳善皋

蘭縣知縣候補知州楊憲言皋蘭縣知縣蔣重熹
古浪縣知縣舒玉龍永昌縣知縣林昂霄山丹縣
知縣萬邦英前任古浪縣知縣徐樹梅漳縣知縣
夏恒等十三員將浮冒賑糧銀數及被上司勒取
交辦物件等項用去銀數逐一開寫前來臣等閱
該員等開出各款勒爾謹雖未向屬員婪索多贓
亦曾收受宗開煌銀一千兩且屢次交辦物件致
送過往人情所用甚多王亶望任內則無人不向

其勒索多金賊欺累累尤為貪縱王廷贊尚未收
受屬員銀兩亦有交辦物件情事查甘省地瘠民
貧官場素稱清苦此衆人所共知勒爾謹等身為
甘省上司更應稔悉何以竟令屬員買物賠墊甚
且公然勒索是明知各該州縣辦理監糧賑卹大
有侵漁遂爾分肥染指核之前次福寧所供各處
報災分數俱由藩司議定或于總督具奏後藩司
補取道結或取空白由藩司填定等語其為上下

通同一氣冒銷舞弊已無疑義臣等查各該員所
供雖尚有不實不盡之處而大局已破百喙莫解
謹將陸瑋等親供錄呈

御覽請

勅交留京王大臣刑部堂官

行在軍機大臣分別嚴訊奏入

上諭內閣曰甘省收捐監糧一事原因邊陸地瘠民貧
應令倉儲充裕以備賑卹之用是以復經允行乃開

例之始即公然私收折色甚至通省大小官員聯為一氣冒賑分肥扶同捏結積成弊藪既經敗露自不得不徹底跟究現據阿桂等陸續查奏歷年情弊俱已水落石出是竟以朕惠養黎元之政作為官吏肥蠹之資實屬愍不畏法為天理所不容況辦賑之事有濫必致有遺若官更多一分侵漁即災民少受一分實惠朕之所以嚴行窮究者正欲剔除官吏積弊使百姓實受賑卹之益並非因辦賑有弊轉將賑卹

之事靳固不舉也前恐各督撫誤會此意或致有災
不辦曾經明降諭旨宣示中外但恐督撫等仍未能
仰體朕懷且不肖之員或以于已無可分肥即于民
視如膜外其所關於民政者甚大朕如傷在抱偶遇
各省偏災不惜多發帑金優卹不使一夫失所此天
下臣民所共知共見者各該督撫務皆以愛民卹災
使得均沾實惠為念遇有地方水旱即詳悉查勘據
實奏報加意賑卹斷不可緣有甘省監糧之案遂爾

因噎廢食以致稍有諱飾倘如此申誠再三而督撫等仍有蹈此者經朕察出必重治其罪將此再行通諭中外知之

癸丑

上命軍機大臣傳諭留京辦事王大臣山西巡撫雅德曰連日令軍機大臣嚴訊王廷贊據供有武威縣知縣朱家慶固原州知州郭昌泰各饋送王亶望銀兩或二千或三千交坐省長隨送進朱家慶係漢軍已

告病回京郭昌泰係山西人已丁憂回籍等語著將
朱家慶郭昌泰二人各行提取嚴訊確供迅速具奏
上又命軍機大臣傳諭阿桂李侍堯曰據王廷贊供金
縣知縣邱大英西寧縣知縣詹耀璘各饋送王亶望
銀兩二三千等語邱大英詹耀璘現任甘肅知縣著
傳諭阿桂等就近提訊得有確據即嚴叅歸案辦理

同日

上諭內閣曰據吏部查奏王亶望王廷贊甘肅藩司任

內曾任本道首府首縣各員除秦雄飛等八員業經革職拏問圖桑阿等三員現已病故外所有前署蘭州道之現任西寧道劉光昱前署蘭州府知府康基淵前署皋蘭縣知縣現任蘭州府知府陸瑋現任皋蘭縣知縣蔣重熹俱著革職拏問交阿桂等併案審辦其捏結舞弊之各道府州縣仍俟吏部查明具奏另降諭旨

同日

上命軍機大臣傳諭阿桂李侍堯曰昨據戶部奏甘肅監糧自開捐以後節據該督造冊糧石並以各州縣舊有倉廩不敷存貯共請添建者二十六案估需銀一十六萬一千八百餘兩經戶部准令添建即于所收捐監倉費銀內動支造報工部核銷在案今查明此項既無本色糧石則從前該省請添建倉廩何糧可貯顯有捏冒情弊不可不徹底查辦等語所奏甚是本日又據工部將甘省請建廩座現在核議及從

前准銷未銷各案請一併敕交阿桂李侍堯徹底查明具奏一摺與戶部所奏事屬一例建立廩座原為收貯糧石而設甘省自乾隆三十九年勒爾謹奏准開捐以來即私收折色通省糧石盡屬紙上空文即現有倉廩已為虛設何得又請添建其為捏報蓋造侵蝕公帑已無疑義著傳諭阿桂等將請添建廩座之各州縣派令滿漢軍機章京分路前往查勘有無廩座據實覆奏

庚申阿桂李侍堯奏言官兵於本月初六日殲滅
撒拉爾逆回將割獲首級令前此被擒現尚監禁
之韓三十九及韓阿渾即馬六十七逐一辨認據
認出頭人馬作南馬三十五首級即於蘭州各門
懸掛號令至生擒賊人內有馬良海受傷甚重於
拏獲後斃命亦即梟取首級懸示訖其唐宗第等
六犯傷重垂斃不能取供當即先行正法尚餘賊
犯大小六十名

臣

等詳細研鞫雖無緊要頭目在

內擇其人稍明白於蘇四十三起事及盤踞華林
山始終抗拒官兵情形畧為知悉可備訊問且傷
痕尚輕不妨起解者馬達烏特韓四個韓三個三
名同韓阿渾即馬六十七蕭得福共五名交侍衛
泰斐英阿福寧阿爾都管押於本月十二日自蘭
州起程解逆

行在審辦此外傷重賊犯二十五名於取供後先行正
法傷輕之三十一名於十二日致祭陣亡將士時

正法同陸續正法之前次挈獲賊犯韓三十九一名又馬牢沙等六名及閏五月十九官兵挈柵圍攻後節次自賊營投出之老教二十名一併開單進

呈

同日阿桂李侍堯又奏言明亮已於初八日起程馳赴

行在羅江鱗亦於是日起程回滇初九日海蘭察帶侍

衛章京拜唐阿六員名起程初十日

乾清門侍衛彰霽明山阿蘭保起程十一日額森特
乾清門侍衛那木札帶同侍衛拜唐阿十三員名起
程十二日

乾清門侍衛泰斐英阿福寧二等侍衛阿爾都押解
賊犯起程十三日舒亮帶同侍衛拜唐阿十一員
名起程所有阿拉山兵舊教土兵并寧夏涼州莊
浪滿兵業經撤回鄂輝帶領屯練降番亦於日內

回川北外西安滿兵及綠旗官兵亦即分起陸續
撤回俾道路不致擁擠其將軍副都統提鎮等俱
隨本管營兵按日起程至副護軍叅領達薩鼐藍
翎侍衛萬濟鼐巴圖因受傷稍重暫留蘭州俟調
養就痊再令起程赴京均奏入報

聞

同日

上諭內閣曰前據阿桂等奏殲擒逆回餘黨所有在事

出力員弁業經降旨分別加恩卹賞茲據阿桂復查
明前次打仗時漢土弁兵內甘州提標守備馬斌四
川千總唐萬年循化營千總蕭福祿延綏鎮標把總
孟學易始終在頭敵打仗奮勇殺賊並經受傷馬斌
等俱著加恩賞戴藍翎涼州兵張世儒固原兵洪光
耀延綏兵孫仲喜王寧義上屋擊打賊匪奮勇出力
張世儒等俱著即賞補把總撒拉爾土司韓光祖屯
練巴圖魯藍翎土把總阿旺藍翎土千總雍中依沙

斯俱帶兵打仗奮勇殺賊韓光祖等俱著加恩賞戴
花翎屯練土千總阿朋土外委雍中朋帛噶爾角克
土千總阿結別斯滿土千總安爾多節次打仗殺賊
並經受傷雍中朋等俱著加恩賞戴藍翎以示優獎

壬戌

上命軍機大臣傳諭阿桂李侍堯曰甘省監糧一案據
阿桂等查奏開例之始全係私收折色並無實貯在
倉而從前袁守侗阿揚阿欽差前往盤查據稱倉糧

係屬實貯其言殊難憑信該省監糧既未買補則倉儲焉能足數此必當日地方官一聞查倉之信挪東掩西為一時彌縫之計其簽量人役均係該地方官所管易於通同弊混而袁守侗等受其欺蔽率稱並無虧短亦未可定當日州縣各官現在甘省者無難訊究得實著傳諭阿桂等即行確切訊究令將袁守侗等往查時該員等如何挪移掩飾其人役等如何通同弊混之處訊取確供據實覆奏

已已阿桂李侍堯奏言臣等派委按察使福寧前往安定縣查拏馬明心家屬及心腹徒弟并伏羌縣為伊斂銀之新教阿渾等嗣據該司稟稱于七月初四日行抵安定屬之秤鈎駟距官川一百四十餘里該處山路叢雜若多帶兵役恐致逃竄轉難搜捕即督同安定令黃道熈選帶幹役數名星夜前進於初五日已刻猝至官川馬明心家擒獲該犯堂弟馬三娃即馬廷美並馬明心之妾張氏幼

子二名女孩二口馬三娃之母孫氏又獲逆犯張
懷德之妻馬氏並訪得馬明心之長子四十九久
匿另莊回民馬德裕家隨押令協差飛拏將馬四
十九並馬德裕及伊子馬明耀獲解次日又拏獲
外來從教之伏羌回民齊明齊月臨潼回民拜得
明清水縣回民蕭明正山西蒲州回民廉梓玉新
教教讀馬成祥馬明心表弟馬朝林另莊居住之
車滿倉督押至縣又於縣城拏獲逆犯張漢之妻

馬氏女二口犯兄張柱妻李氏子女四口飭縣分別解省並查官川地方大小村莊俱係漢回雜居其馬明心所居官川堡莊內共有回民三十餘戶分上下堡上堡係馬明心等居住下堡則係舊教自馬明心正法從前無知被惑者俱各驚惶失措情形甚屬畏懼至護送馬明心之馬成德馬如玉馬成林馬薩滿拉即馬如昌亦經黃道哭選差弋獲該司於初十日行抵伏羌即督同該縣選差幹

役將斂銀附從各犯密拏於十一十二等日據拏
獲馬得建馬立格馬景元馬伏賓馬廷棟馬尚紀
馬廷彩楊鳳鳴馬建業馬正邦楊洪道高兆元馬
良貴馬榮貴馬成龍齊有全一十六犯先後拏獲
解案並據該司稟稱伏羌回民衆多當即傳集剴
切曉諭驚疑盡釋感悔涕零咸安堵如常等語該
司於回省之後路過隴西又拏獲逆犯張明得張
懷德家屬共十五名口一并分起解省臣等提集

各犯逐一嚴加鞠訊各供俱係新教回民或向從馬明心念經稱大徒弟或不遠數千里前來拜從或與馬明心交密為之經理家務或於馬明心起解時直送至省或於馬明心正法後羣聚誦經或代馬明心收銀或藏匿馬明心之子其伏羌縣所獲馬得建等十六名內馬建業八名俱係新教阿渾有糾約斂資者有出銀餽獻者有攜銀代送者種種情節俱各供認惟僉稱與撒拉爾地方遙遠

向不認得蘇四十三實無從逆情事其伏羌縣回
民斂銀一節亦在蘇四十三起事以前並不知馬
明心已經正法等語臣等因拜得明等俱係隔省
回民遠至官川拜從馬明心已屬可惡至馬明心
業經正法尚敢聚居誦經實屬愍不畏死查馬明
心創教起釁致蘇四十三藉端滋事今安定各該
犯附從馬明心雖未敢乘機接應公然通賊伏羌
各犯為馬明心糾約斂銀亦在蘇四十三未起事

之前均與實在從賊有間但既拜從馬明心為師
甘心崇奉即與逆黨無異未便僅照邪教為從律
定擬應將附從馬明心之馬德裕馬明耀馬成祿
馬成祥馬朝林車滿倉馬成得馬如玉馬成林馬
如昌齊明齊月拜得明蕭正明廉梓玉馬得建馬
立格馬伏賓馬景元馬廷棟馬尚紀馬廷彩楊鳴
鳳馬建業馬正邦楊洪道高兆元馬良貴馬榮貴
馬成龍齊有全并前所拿獲監候待質之馬而立

即馬尚德三十二名概行正法以示儆戒至馬明
心堂弟馬廷美即馬三娃張漢之兄張柱張懷德
之兄張懷雄張明德之父張士榮姪張二娃五名
照緣坐律概予斬決馬明心張漢張懷德張明得
之妻妾子女等共二十六名口分別發遣其婦女
發往伊犁給與厄魯特索倫察哈爾兵丁為奴幼
男發往雲南之普洱廣西之百色極邊烟瘴充軍
並咨查拜得明廉梓玉各原籍有無煽惑為匪情

事至唐家川洪濟橋等處從逆餘黨已據布政使福崧等稟稱業經搜獲數十名及各犯家屬數十名口仍飭令再行實力搜拏毋致漏網奏入

上諭內閣曰據阿桂等奏按察使福寧督率安定縣知縣黃道嘏查拏逆回餘黨及應行緣坐各犯家屬不動聲色俱就弋獲且傳集回衆剴切曉諭俾衆心驚疑盡釋感激涕零咸皆安堵辦理頗屬得宜福寧著加恩賞戴花翎並著交部議叙知縣黃道嘏著一併

交部議叙以示優獎

同日阿桂李侍堯又奏言查逆匪滋事以後據循化廳等處搜獲各該犯屬婦女幼男共五百名口除陸續監斃並首逆家屬正法共一百五十八名口外現在各屬監禁婦女二百五十九口幼男八十三名查各犯俱係新教回匪其應行緣坐幼孩未便併發新疆致滋煽惑應遵

旨將婦女發往伊犁賞給索倫察喀爾厄魯特兵丁為

奴幼男發雲南之普洱廣西之百色極邊烟瘴地方充軍所有婦女二百五十九名分作七起幼男八十三名分作兩起俱間日起解檄飭營汛撥兵護送其循化續行搜獲犯屬並安定伏羌唐家川等處挈獲各犯家屬俟解到時亦即照例分別發遣奏入報

聞

同日阿桂李侍堯又奏言

臣

等前奉

諭旨令甘省大小官員據實供吐業將陸瑋等親供錄

呈

御覽嗣據陸續來省之知府鐘賡起汪臯鶴張金城候

補同知邱大英等十五員各將浮冒賑數及餽送

上司並代買物件等項銀數開送前來臣等閱各

該員供詞雖尚有不盡而上下通同冒賑開銷各

情弊業已供認不諱臣等又接奉

上諭據王廷贊供邱大英詹耀璘等各餽送王亶望銀

兩等因^臣等復傳集邱大英等二員嚴加詰問邱大英供在金縣任內兩次送過王亶望銀四千兩邱耀璘供在西寧縣任內兩次送過王亶望銀四千兩等語該員等所供饋送情節相符又有代買物件及送過盤費銀尚不止王廷贊所供三千之數應將該二員遵

旨歸案辦理現任蘭州道圖薩布係上年十月到任^臣等傳訊該員據供我到任時初賑加賑早已辦過

今春展賑亦係上年辦定之案至現在甘省造報捐監冊只辦過四十五年夏季其秋季尚未造報我係十月到任各屬所捐糧數並未出結等語臣等恐該員尚有索取屬員供應及銀物等事復訊之前任皋蘭令楊惠言現任皋蘭令蔣重燾僉供圖薩布自到蘭州道任首縣並無供應亦未收受伊等銀物等語可否將圖薩布暫免革職拏問如續有查出通同舞弊實據再行嚴叅治罪之處伏

候

欽定奏入報

聞

欽定蘭州紀畧卷十三

欽定四庫全書

欽定蘭州紀畧卷十四

庚午

上諭內閣曰行在大學士九卿會審勒爾謹王亶望王
廷贊等捏災冒賑侵蝕監糧通同舞弊營私各款按
律定擬請旨即行正法一摺朕酌核三人情罪即予
駢誅亦所應得但其中稍有別區不得不為明白宣
示者甘省收捐監生本欲藉監糧為備荒賑恤之用

乾隆三十九年經勒爾謹奏請開例議准允行原令祇收本色糧米其時王亶望為藩司即公然私收折色銀兩勒爾謹竟如木偶毫無見聞於是王亶望又倚任蘭州府知府蔣全迪將通省各屬災賑歷年捏開分數以為侵冒監糧之地上下勾通一氣甚至將被災分數酌定輕重令州縣分報開銷上侵國帑下屯民膏毫無忌憚嗣後王廷贊接任藩司既知折色之弊雖稟商該督欲請停捐乃仍復因循觀望並不

據實陳奏且將私淑折色一事議定改歸首府
辦理而一切弊竇仍未革除若非朕特降諭旨令阿
桂等密行查辦則始終蒙蔽王亶望諸人竟得安然
飽其慾壑倖逃法網有是理乎今王亶望勒爾謹王
廷贊等拏解行在審勘所有伊等冒賑分肥婪贓舞
弊各款俱一一供認明確俯首無詞夫國家任用總
督藩司本欲令糾察屬吏遇有積蠹病民之官隨時
舉劾俾民瘼得以上陳而恩膏得以下逮朕臨御四

十餘年以來無日不以敬

天勤民為心凡各直省偶遇偏災即飭地方大吏加意撫綏降旨賑恤此中外臣民所共知共見者即查辦此案朕早有風聞猶恐各督撫或誤會朕意因噎廢食致將災賑之事靳固不舉是以遲回未發者已二年矣今諸弊已露若再不辦是朕不能懲貪察吏朕豈肯受此從前恒文方世儁良卿高積錢度等俱以婪贓枉法先後伏誅然尚未至侵蝕災糧冒銷國

帑至數十萬金如王亶望之明目張胆肆行無忌者
王亶望由知縣經朕加恩用至藩司巡撫乃敢負恩
喪心至此自應即正典刑以彰國憲王亶望著即處
斬至勒爾謹本一庸懦無能之人因其平日尚屬小
心勤慎用為總督從前逆回一事原因勒爾謹養癰
貽害所致即收復河州亦係布政司福崧在彼籌畫
幫同辦理勒爾謹失機貽誤本即應正法彼時朕尚
從寬改為監候今又于王亶望私收折色冒賑婪贓

一案全無覺察且已亦收受屬員代辦物件一任家人等從中影射侵肥種種昏庸貽誤罪更難逭但朕究以用人不當自引為愧未肯即令肆市勒爾謹著加恩賜令自盡至王廷贊以微末之員擢至藩司受恩深重乃于接任王宣望交代時不惟不據實叅奏且效尤作弊雖未收受屬員銀兩亦有派買物件並加收心紅紙張銀兩之事其罪亦難未減況從前令留京辦事王大臣及刑部堂官審訊時令其將此案

冒賑私收及王亶望婪贓等款詳悉供吐並硃筆傳諭
王廷贊伊之生死總在此番實供與否令伊自定朕
不食言乃竟始終匿飾不吐實情豈非自取其死但
究念蘭州守城微勞免其立決王廷贊著加恩改為
應絞監候秋後處決交刑部按例入秋審朕辦理庶
務一秉大公至正此事既經發覺自不得不徹底查
辦嗣後內外大小臣工益當互相砥礪各凜冰淵共
矢愛民潔己之誠毋蹈簠簋不飭之戒所有辦理此

案前後情節著通行曉諭中外知之

臣等謹案甘省封疆大吏不思潔己奉法率屬
惠民乃公然侵蝕冒銷蠹國病民為從來所未
有浸至積戾召殃致有逆回蘇四十三之事王
宣望諸人種種劣蹟始各敗露迨擊解

行在

皇上親鞫於

廷復

命大學士九卿會勘情真罪當百喙無辭爰明示懲創
以申

國憲從此吏治肅清

恩膏下逮所謂辟以止辟者乎

八月辛未

上諭內閣曰昨行在學士九卿等審訊王亶望時據
供署中親友常有囑托捐監之事我就令屬員填給
實收送進並未發給糧價等語此等夤緣熱中之人

王亶望既為囑托屬員捐監自必又有加捐官職銓選地方之人若輩出身既不可問倘任以地方事務必致賄賂公行毫無忌憚於吏治官方大有關係不可不徹底查辦現在阿桂會同李侍堯查辦擅災冒賑之案著即就近查明王亶望及其餘道府任內將子姪親友幕賓令屬員填取監生實收之人現在遞捐官職銓選及分發各省試用者查明一併革職即現係監生並未捐官者亦應追奪監照按名褫革俾

知名器不可濫邀以杜鑽營倖獲之弊其餘四庫全書處効力監生內如有經王亶望送給實收濫邀議叙者亦著一體斥革仍加恩俱免其治罪其總裁朕俱加恩不問但以後自當加慎勿謂朕不教也又據程棟供蔣全迪亦有交首縣捐監不發銀兩之事著一例查辦至甘省收捐監糧自王亶望始收折色王廷贊旋踵其弊歷年所捐監生不下數十萬皆屬濫廁成均本應交部按名褫革始念人數衆多且尚係

本生自出已資與填給空名冒稱實收者有間著一體加恩免其斥革將此通諭中外知之

甲戌阿桂李侍堯奏言臣等查辦監糧一案將捏

報災賑之道府州縣通行查核自乾隆四十年起至四十五年止假捏結報之道府直隸州共五十
三員各州縣內未捐監辦災者祇有十六員其止
捐監而未辦災者四十六員捐監報災者一百十
二員其收捐監生自數百名至數千名不等開銷

賑恤糧數自數千石至數十萬石不等臣等連日將現在省城各員嚴切訊問據供餽送上司代辦物件往來支應捐修工程日用花銷各款大概相同伏查各省報災皆由災民呈訴地方官勘報後又經府道等逐層查勘始具報呈災分數甘省則一屆夏秋各屬紛紛具報而其准否輕重則總督與藩司面為商定厚薄因人而施多寡惟意所欲除首縣供應各上司每年俱准多開外其他或

藉口衝途差務之賠墊則浮冒亦多至地居偏僻
缺亦不甚清苦如狄道河州等處而多開賑糧者
大抵皆善於逢迎及加意餽送之人藩司多給實
收非酬其素日之殷勤即冀其將來之答報捐監
既多不得不重報災賑以開銷總之通省大小各
員聯為一氣冒賑分肥遂至積成弊藪牢不可破
在各州縣既藉冒賑為浸漁之地勢不得不稍為
給散及冬間捐辦煮粥施衣等事以掩人耳目邊

地窮民本無必欲報災之念轉得年年食賑並可
邀

恩蠲緩亦所樂從是以歷年以來並無出而控告者此
皆實在情形也雖現在各員所供尚有不盡之處
而其浮冒侵漁情弊業已水落石出無難定案再
此等劣員實屬慝不畏法為天理所不容在我

皇上所以嚴行窮究止欲剔除官吏積弊使百姓實受
賑恤之意原非靳惜監糴為若輩所花銷而

國家數百萬帑糧亦不可懸宕無著況此等貪黷之吏
即將家產查抄入官亦不足抵其浮冒之數豈可
使尚擁厚貲是以陸瑋鄭陳善揚惠言蔣重熹四

員臣等接奉革職拏問

諭旨即一面將伊等任所貲財查封脩抵並行知前任
蘭州府知府蔣全迪原籍任所督撫一併查抄至
道員劉光昱任所貨財亦已查封存記以備分賠
其離任而尚在甘省之陳鴻文等十一員臣等另

行查辦外其原籍並查明移咨辦理至已離甘省
各員凡冒銷賑糧者應請

旨交吏部查明各該員旗籍及現任處所

勅交留京王大臣及各督撫按名查封毋令隱匿寄頓
並即轉飭訊問各該員令其逐一供認如已得實
即可定擬具奏如或狡飾即派員解甘質審歸案
辦理其在省各員因一時乏人委署暫緩叅革查
封俟揀發人員到甘亦即分別查辦奏入

上諭內閣曰甘省大小各員將災賑監糧侵吞舞弊上
下聯為一氣茲阿桂等在甘查辦其積弊始得盡破
現在阿桂等屢次查奏俱已得實朕向有句云不為
已甚去已甚今甘省積弊竟至已甚不可因罰不及
衆仍存姑息朕實無可如何矣所有捏報各道府直
隸州知州內除按察司福寧首先供出且經手事件
較多暫行留任外其現任甘省道員奎明文德王曾
翼永齡四員現任甘省各知府及署任知府宗開煌

彭永年彭時清鍾賡起汪皋鶴張金城郭嘔李本楠
又現任甘省直隸州及署任知府侯作吳黎珠趙明
旭興德謝桓宋學淳董熙厲學沂侯簡放分發人員
到省即著阿桂等傳旨將該員一併革職歸案審辦
其已離甘省各員現任鹽運使程國表原任布政使
福明安現任道員觀祿前任甘肅知府及現任知府
潘時選黃元圮周人傑諾明阿富斌德明郭昌泰觀
亮前任甘肅直隸州及署知州知州博赫彥方姜興

周奇明朱蘭王汝地各員又在京供認捏災冒賑及鎖送王亶望銀兩之前任武威縣知縣朱家慶一員俱革職交留京辦事王大臣及任所原籍各督撫將該員提訊錄取確供具奏

同日阿桂李侍堯又奏言查王亶望任內假捏結報之歷任各道府直隸州現在訊問伊等止稱積習相沿通省如此辦理亦未肯將通同舞弊之處供出即其所屬州縣平日有餽送逢迎之事見道

府等尚未去任未必不預留地步安能據實指陳
況現在所有道府直隸州雖以原銜辦事伊等自
知身犯重罪革職審究即在目前一切俱不能得
力恐廢弛貽誤於地方大有關係應請

旨一併革職並將道府各員無論請

旨簡放及部選之缺均請

皇上簡員補授准令馳驛迅速來甘其直隸州知州
勅交留京王大臣于各部保舉奉

旨記名人員內揀選三員分發來甘臣李侍堯酌量奏補則辦事不至乏人而地方亦有專責奏入

上諭內閣曰阿桂等奏請簡發道府各員迅速來甘著交都察院堂官於滿漢科道內保舉堪勝道員者五員六部堂官於滿漢司員內保舉堪勝知府者八員此內戶刑二部各保二員其餘四部各保一員令其速赴行在帶領引見發往

上又諭內閣曰阿桂等奏甘省直隸州知州員缺需人

補用請揀選三員分發來甘等語此項直隸州知州
母容另行揀選即著將前次留京辦事王大臣揀選引
見未經發往之顏培天任嘉春吳貽桂三員由京馳
驛迅往甘省交李侍堯酌量奏補

同日李侍堯奏言據隴西寧夏寧朔平羅等四縣
詳報七月初一二等日天降大雨該處附近河湖
人戶猝遇水勢漲溢所種秋禾被淹間有冲塌房
屋淹斃牲畜

臣

隨飭該道府州親加查勘旋據查

得隴西縣屬西渭二河一帶村庄寧夏縣屬逼近
黃河之通寧等十堡寧朔縣屬附近十二連湖之
王泉等十三堡平羅縣屬通義等十四堡被災屬
實臣一面飛飭各道府督率該縣等將被水各村
莊分別成災輕重其被災窮民先行加意撫卹查
明照例妥速辦理再金縣靖遠安定會寧伏羗碾
伯大通等七縣所被旱電黃疸之處係在四五分
以內雖例不成災但收成均不免減薄可否將該

漲溢之隴西寧夏寧朔平羅等四縣貧民口食未免拮据著該督即董率所屬先行加意撫卹其房屋牲畜亦有冲倒淹斃之處並著即行查明照例辦理至李侍堯查奏各屬秋禾被旱被雹又被黃疸等處內金縣靖遠安定會寧伏羌碾伯大通等七縣雖據勘明俱在四五分以內例不成災但念該屬今歲承辦軍需一切輓運糧草民情甚為踴躍並著加恩將該七縣本年額徵銀兩蠲免一半其餘緩征以昭優卹

臣等謹按甘省辦理冒賑一案原因官吏肥索殃民不得不痛加懲創除積弊正所以卹民瘼我

皇上保赤為心每遇偏災

恩賑寧濫毋遺

訓諭屢頒凡有血氣心知無不曉然共見者茲督臣李侍堯奏到被災各屬情形查勘得實即

特降諭旨所有黃水漲溢之處加意撫綏其旱電等災

在四五分以內者俱令分別蠲緩無致向隅蓋至是而邊氓得霑實惠倍感決于

皇仁矣

乙亥留京辦事王大臣奏言據現任光祿寺署正陳巖祖投遞呈詞以該員曾署甘肅環縣知縣任內有折捐冒賑情弊具呈自首臣等面加詢問據陳巖祖供我係湖南祁陽縣人陳輝祖是我胞兄於乾隆四十年十二月署理甘肅慶陽府環縣事

務四十一年加捐光祿寺署正四十二年二月離
環縣任在任辦過霜災一次散賑銀一萬兩零捐
監實收二百張所收監糧俱係折色至霜災實是
有的散賑亦係實在發給不過多報分數這散賑
銀之內約畧冒銷銀二千餘兩我于王亶望生日
送金子五十兩又署本府侯作吳曾向我要過實
收十五張該銀八百餘兩並未發給餘俱零星花
用等語查該員雖自行呈首恐尚有不實不盡之

處應請

旨將陳嚴祖供詞寄交大學士公阿桂等將所供情節
逐一查訊奏入奉

上諭阿桂等歸案辦理

丁丑江西巡撫郝碩奏言

臣於七月十八日欽奉

諭旨將現任廣信府知府康基淵飭訊冒賑分肥各款

當即飛檄馳調該員來省查詢及二十日接奉革

職等問

諭旨計已起程在途即派因公在省之南安府知府蔡
葵迎往摘取印信並派員催押來省去後至二十
七日據鉛山縣知縣鄭若玉到省稟稱康基淵于
二十一日接到臣初次調檄自郡起程舟行一百
餘里至該縣之青山灣地方夜間乘同舟家人等
睡熟在床自縊身死臣聞信之下不勝詫異該員
心虛畏罪情事顯然臣除飛飭署臬司杜憲馳往
驗屍并詢究同舟親屬是否知情有無別故提同

屍棺到省臣親加覆驗外至鉛山縣知縣鄭若玉
於康基淵在境自盡並不飛行馳報由水路緩程
來省回稟又不即時押帶屍身赴省聽候委驗殊
屬糊塗玩忽應請

旨將鄭若玉革職以示懲儆奏入

上勅部知之

戊寅協辦大學士吏部尚書蔡新等奏言查乾隆
三十九四十四十一等年戶部捐冊內有捐納員

外郎王裘捐納主事王榮王焯俱註明係王亶望之子伊等捐納之項皆王亶望在甘肅藩司任內侵吞國帑婪得贓銀為之報捐未便任其銓選應請

旨將王裘所捐之員外郎王榮王焯所捐之主事各職銜即行革去奏入

上諭內閣曰王亶望之子王裘王榮王焯僅革去職銜不足蔽辜著照勒爾謹之子伊凌阿等之例俱發往

欽定四庫全書

卷十四

伊犁交伊勒圖嚴行管束自備資斧充當苦差

已卯阿桂李侍堯奏言臣等接奉

上諭將袁守侗等盤查甘省監糧時該地方及人役等如何通同弊混徹底研究實情具奏等因欽此

臣

等查當日州縣各官之現在省城者止有陸瑋等數員即嚴切訊問據各該員供稱或將應動常平倉糧用銀折給留作監糧以抵盤查之數或將額徵糧內應行撥運兵米暫留抵補其額存監糧

有數百石及百餘石者聞盤查之信即趕緊買補
是以彼時並未短少各等語伊等既如此供吐則
通省可知臣等伏查甘省監糧積弊不在虧短而
在冒銷平日既任意開除應存實貯之數有限盤
查時自易於彌封掩飾查袁守侗等原摺內稱甘
省監糧自開捐起截至四十二年年底止通共收
捐監生十七萬六千七百餘名應收各色京斗糧
七百八十六萬二千餘石除歷年各項動用外實

存糧一百十二萬二千餘石分赴各州縣就冊開
現存數目逐細盤驗俱係實貯在倉委無虧短等
語摺內並未將彼時甘省額貯常平倉糧若干曾
否同時盤查有無虧折之處聲明查乾隆四十二
年甘省各屬應存常平額徵及社倉糧共三百九
十七萬五千餘石以之挪補監糧尚多三倍有餘
移東補西業據各員供吐王廷贊所供不特盤查
監糧並盤常平倉穀之語顯係虛飾如果同時盤

查豈有袁守侗等轉不奏明以見其周到之理至
勒爾謹既經奏請盤查自必預飭各州縣早作准
備而當日該地方官一聞

欽差查倉之信亦必設計彌縫以圖蔽混於一時

臣閱

袁守侗所奏原單內其各屬所貯監糧開除無存
者已有十餘州縣而蘭州府所屬共收糧二百四
萬八千餘石至盤查時止存一萬八千三百餘石
分貯皋蘭狄道河州金縣靖遠五州縣並紅水縣

丞等處多者數千石少者不過數百石即使臨時
買補亦易為力況其中或將應發常平倉糧以折
色支放扣存本色或以應運兵糧捏稱實貯預備
盤驗種種舞弊素守伺等皆不得知但以冊存與
實貯相符遂為了事此當日實在情形也再查甘
省捐監原為補足常平額貯倉糧起見則監糧與
常平本無岐異遇有動支自應先將常平舊貯倉
糧儘數動用以新收監糧抵額或動支監糧則常

平理應封貯乃甘省各屬每年開除監糧之外又
動用常平糧自五六十萬至百餘萬不等此即弊
混之源且三十九年通省未開捐以前舊存常平
糧尚有一百二十七萬自開捐起至四十二年止
轉祇存一百八十八萬石若以盤查時所存監糧
一百十二萬之數抵補三十九年常平原額尚屬
不敷其為王亶望王廷贊恐盤糧顆粒無多故先
動用常平預留地步而屬員即借常平額徵為影

射已無疑異

臣

等伏思袁守侗等奉

命盤驗監糧雖係各員通同弊混現無供有賄囑情弊
但捐監未及三年何以開銷監糧至六百餘萬之
多而舊存常平糧又銷去一百三十餘萬石若以
未開捐前每年動用糧數稍為查核比較則疑竇
自出弊端自露乃袁守侗等並不計及開除糧數
太多轉稱每年節省採買銀百餘萬兩現在倉貯
仍有糧百餘萬石為辦理捐監明效其奏報失實

上 負

皇上任使之意諒袁守侗阿揚阿亦不能自引解免應

請

旨交部嚴加議處至當日彌縫掩飾各州縣即係現在
審出藉賑開銷監糧之人應仍歸案從重定擬完
結奏入

上諭內閣曰甘肅監糧並未實貯在倉朕早有風聞特
因監糧為災賑而設恐各省督撫或誤會朕意致將

災賑之事靳固不舉轉非朕查辦冒賑使百姓得受實惠之意今諸弊已盡行敗露若再置而不問何以懲貪吏而整法紀至袁守侗阿揚阿係朕特派前往盤查監糧之人豈無耳目乃一任各州縣通同蒙蔽計前此盤查時距開例未及三年而開銷監糧至六百餘萬石之多亦應問其故也至舊存常平倉又銷去一百三十餘萬石其中弊端疑竇何以並未察及阿揚阿人本見小護短不知大體若袁守侗則未必

至此阿揚阿前於朕前面奏曾盤驗常平倉穀今據阿桂等查奏情節已屬失實素守伺阿揚阿查辦此案均難辭咎著交部嚴加議處

辛巳廣西巡撫姚成烈奏言

臣遵奉

諭旨傳訊在籍之原任慶揚府知府黃元玘據供乾隆三十三年六月到涼州府知府任已于三十一年停止捐監之後並未收捐監生至三十五三十七年所屬一廳五縣被旱共辦災賑三次係銀米兼

賑由知府加結報銷今甘省既查有冒賑浮開是
各廳縣弊混元圮不能查出濫行出結罪實難辭
並無串捏分肥情事後於三十九年四月調慶陽
府知府至四十年十月卸事時止正值重辦捐監
之時實係收捐本色實貯在倉並未串同屬員私
收折色情弊等語臣查黃元圮所供監糧實貯並
無串捏分肥俱屬一面之辭顯因現無案證有意
狡飾應請

旨將黃元玘革職嚴行看守臣已飛咨陝甘督臣李侍

堯如應將該員提質即派員押解赴甘審辦奏入

上命軍機大臣傳諭阿桂李侍堯姚成烈雅德曰甘省
各州縣收捐監糧折色於災賑時捏報開銷業經阿
桂等徹底查辦供認明確此案弊竇俱已和盤托出
何以黃元玘猶復裝點情節希圖狡飾著傳諭姚成
烈即速派妥員解往甘省交阿桂等歸案嚴審若有
捏飾于定案時加倍治罪又前任固原州知州郭昌

秦前據雅德訊問該員款跡亦狡供掩飾並著一併
解赴甘肅交阿桂等審辦不必解交行在並著傳諭
各督撫現在審訊案内人犯如有似黃元玘郭昌泰
之始終狡飾不吐實情者即一面訊供具奏一面將
該員解交阿桂等歸案嚴訊一併加倍治罪

欽定蘭州紀畧卷十四